

# «Prévôtois et Prévôtoises»

Messadi da Delémont al pievel da Moutier

DA GUIU SOBIELA-CAANITZ

■ **Il 27 d'avrigl ha il parlament giurassian, cun 58 vuschs ed in'abstenziun, approvà tut las empermischuns dal messadi ad electuras ed electurs da Moutier/BE areguard la votaziun dals 18 da zercladur davart lur appartegnientscha chantunala (...). Sin quai èn regenza e parlament dal Giura in corpore stads si per chantar ensemen l'imni chantunal «La Rauracienne» (1).**

«Cuss. gov. Charles Julliard ha declerà: 'Las empermischuns dal chantun Giura areguard il futur han la finamira da meglierar la situaziun da Moutier (...). Avdants ed avdantas da Moutier ['Prévôtois et Prévôtoises'] as fidaì da nus!» («La Liberté», Friburg, 27 d'avrigl 2017). Il num da Moutier deriva da «monasterium», gist sco «Müstair» e «Mustér». «La signuria aveva num 'prévôté' ['prepositura'] da Moutier pervi dal prevost dal chapitel [claustral] (...)sut il domini da l'uvestg [da Basilea]» (2). La claustra na datti daditg betg pli; per la paja datti oz ina vischnanca da 7690 olmas. «La Liberté» (Friburg) resumescha: «Cun l'offerta duai Moutier vegnir in pol urban da relevanza chantunala, cun set dals 60 deputads, e tegnia 170 plazs da funcziunaris (...). Las autoritads lessan installar là l'uffizi da taglia, la controlla da finanzas, il sectur d'informatica, il tribunal da minnorenas e l'uffizi da sport. La polizia chantunala installass in post a Moutier (...). Tut las gruppas dal parlament giurassian (...) han salidà las spiertas formuladas en il messadi da la regenza (...). Il parlament communal ed il cussegel da citad da Moutier han recumandà in 'gea' al messadi dal parlament giurassian.» Il 27 d'avrigl a Moutier ha Nathalie Barthoulet, presidenta da la regenza giurassiana, declerà: «Sco pol urban en il chantun

Giura vegn Moutier a pudair sa sviluppar meglier (...) ed a pajar pli paucas taglias (...). L'ospital da Moutier vegn integrà en nosa planisaziun da la sanadad» (4).

## Per vegnir la segunda citad dal chantun Giura

Il chantun Giura salidass cleramain l'integraziun da la citad en sia cuminanza chantunala. Il 999 ha il retg da Burgogna regalà l'abazia da Moutier a l'uvestg da Basilea; uschia è naschì il principadi episcopal: «L'uvestgieu medieval da Basilea era ina construcziun politica (...). L'uvestg dominava gia la metropola renana; el ha lur acquistà ina retroterra che ses successurs han amplifigà (...) enfin a la revoluziun franzosa» (3). Quai è la «Rauracie» da l'imni chantunal (v. nota 1). L'abazia medievala da Moutier-Grandval è renumada pervi dal manuscrit biblic ornà cun maletgs e realisà enturn 835 a l'abazia da Tours (Frantscha); lez sa chat-ta oz en il British Museum da Londra. En il chantun Giura fiss Moutier la segunda citad, suenter Delémont (12 513 olmas) ed avant Porrentruy (6829 olmas). Oz è il Giura bernais, anc adina cun Moutier, represchentà en la regenza chantunala da cuss. gov. Pierre Alain Schnegg (pps, Champoz/BR); il president communal da Moutier è Marcel Winistoerfer (pcd).

1. «Du lac de Bièvre aux portes de France, l'espoir mûrit dans l'ombre des cités (...). D'un peuple libre au sein de l'Helvétie, notre passé nous montre le chemin. Unissez-vous, fils de la Rauracie, et donnez-vous la main!» Il pievel celtic dals «Rauraci» viveva enturn Basilea.
2. Kathrin Utz Tremp en: Marco Jorio (ed.), *Dizionario storico della Svizzera*, tom 8. Lucarn (Armando Dadò, ISBN 978-88-8281-259-1) 2009, p. 680, chavazzin «Moutier-Grandval».
3. Jean-Paul Prongué en: Agostino Paravicini Bagliani (ed.), *Les pays romands au Moyen Age*. Losanna (Payot, ISBN 2-601-03190-5) 1997, p. 129.
4. Gasetta «Le Jura libre» (Moutier), 28 d'avrigl 2017, p. 8.